

REGIONAL NEWS BULLETIN

HEADLINES (EVENING)

1. Mizoram chak lakna kawngpui chhia avanga Mizoram a tuialhthei phur luttu Mizoram Oil Tanker Driver Association chuan vawiin khan an nawrh an titawp.
2. Mizoram BJP State President, Dr K Beichhua MLA chuan, Mizoram a kawngpui chhia chungchangah mawhphurtu an awm loh chuan BJP Mizoram-in mawh a la ang a ti.
3. Prime Minister Narendra Modia chuan vawiin khan Maldives a thleng.
4. Thailand leh Cambodia ramri buaina thleng mek avanga sipaite inkahnaah Thai mi 14 an thi tawh a, mi 46 in hliam an tuar.

<><><>

MOTDA CALLS OFF STRIKE

Mizoram chak lakna kawngpui chhia avanga Mizoram a tuialhthei phur luttu Mizoram Oil Tanker Driver Association (MOTDA) te chun vawiin khan an nawrh an titawp a,

Kolasib DC Pu Robert Lalhmangaiha chuan vawiin khan MOTDA Hqrs hruaitute chu Vairengte a an office ah kawmin, Mizoram hmun hrang hrangah tuialhthei a harsat thu hrilh in, an nawrhna titawp turin a ngen a, Mizoram a tuialhthei phurtu Tanklorry te chu load la tur leh load la a ding te chu mipuite harsatna hria a, an nawrh bansan turin a hriattir a.

Kolasib DC chuan, Tanklorry Driver te chu nawrh an huaihawt avanga Mizoram mipuiten harsatna an tawh dan te hrilh in, sorkarin Oil phurtu tanklorry te kal theihna tura hma a lak dan te a hrilhfiah bak ah, Tanklorry driver kal tur te pawh Driver Association lamin kal lo turin an vau bet tih sawiin, Mizoram lut tur Tanklorry kawng laka tangkhang zawng zawng te chu vawiin la la a kal turin a hriattir a, sorkar thu zawm duh lo leh harsatna siam lui an awm chuan an chungah dan lek kawh a nih tur thu DC chuan a hrilh nghal ani.

Hemi hnu hian Vairengte leh a chhehvela Tanklorry 6 ding mek te chu vawiin tlai dar 3:30 khan Vairengte chhuahsanin Aizawl lam pan in an chhuak nghal a, Silchar kawng lamah Tanklorry tangkhang an awm leh awm loh DC hovin enfiah nghal a ni bawk.

DC leh MOTDA hruaitute hi hun engemawchen an in biak hnu ah vawiin khan MOTDA hian an nawrh an ti tawp nghal ani.

<><><>

MNF MOURNS RINTLUANGA

MNF General Headquarters bultumin MLA Pu Lalrintluanga Sailo sunna hun Mizo Hnam Runah hman a ni.

Sunna hunah hian MNF General Headquarters Vice President Pu Vanlalzawman thusawiin, Pu Lalrintluanga chu ram leh hnam tana nun ch n huama hnam sipaia inpe a nih thu leh a ma channa tur ngei ngeiah pawh hotute thupek a nih chuan thuawih taka ti mai thin mi a nih thu a sawi. Pu Lalrintluanga chu a bial tan mai pawh nilo ram leh hnam tan leh MNF tana a hun hmangral thaktu, entawn tur tamtak midangte tana hnutchhiahtua ni a ti.

Pu Vanlalzawma chuan Pu Lalrintluanga Sailo chu midangin Inhmuhisitna tawngkam a an ngaih, Dampa Savawm tih pawh ngaihaw lova pawm hmak tu a nih thu leh, a bial tan leh MNF tan he nihna hi a inhmeh em em thu a sawi bawk a. Ram leh hnam tana zalenna suala inpe te sulhnu chu chhui sak fo a tul thu Pu Vanlalzawma chuan a sawi bawk.

Vawiina Mizo Hnam Run a Dampa Bialtu MLA Pu Lalrintluanga Sailo puala hun hmanah hian MNF General Headquarters General Secretary Pi Vanlalbuki chuan hunserh a hmang a, MNF General Headquarters Adviser Pu TC Pachhunga, pawhin Pu Lalrintluanga Sailo chu a ui thu sawiin, "Dampa constituency tana hna a thawh nasatzia a taka hmuhpuitu a nih thu leh Pu Lalrintluanga Sailo chu Hnam thinlungpu mi, mi inpe a ni a nih thu a sawi a, Pu TC Pachhunga chuan a thusawi zel naah Mizo hnam chu hnam chhanchhuah ngai a nih thu leh hnamdangin Mizote an chimral mai lohnazalenna sual a lo ngai a. Hnam rilru pu mi, Pu Rintluanga pawhin naupang tein hnam movement a zawm thu a sawi a, Mizote chu Israel fate ang mai a hnam a chiang an nih thu leh, MNF party chu Pathian lama an tan chhung chuan Pathianin a ensan ngai loh bakah Hnam rilru pu an tlat chuan Pathianin a tun din leh ang, tiin party mipui kalkhawmte a fuih bawk. Vawiin hnam runa inkhawmah hian Pu Lalrintluanga Sailo sunna leh an ui thu kalkhawmte hnen atangin ngaihthlak a ni bawk.

John Vanlalchhuanga, Akashvani Aizawl.

<><><>

BJP MIZORAM

Mizoram BJP State President, Dr K Beichhua MLA chuan, Mizoram a kawngpui chhia chungchangah mawhphurtu an awm loh chuan BJP Mizoram-in mawh a la ang a ti. Vawiina BJP Mizoram Friday Political Sessionah thusawiin Dr Beichhua chuan, vawiina Mizoramin harsatna a tawh mek- inkalpawhna kawnga harsatna te, nitin ei leh bar zawinna kawnga harsatna nasa tak a tawh mekah te, Zoram hnufual chhanah te mawhphurtu an awm loh chuan BJP Mizoram-in a phur thei a ni a ti a, heng harsatna thlen chhan hi State-a BJP a sorkar loh vang a ni a ti a. BJP Sorkar se chuan heng harsatna te sutkian hi a ni dawna, vawiina buaina bul ber, inkalpawhna kawngpui tha te pawh Mizoram chuan a nei thei dawn a ni, a ti.

Dr. K. Beichhua chuan, thalaite tan kawng hawnsak chu an tih tur leh an tum a ni a ti a, mi retheite chawikan an nih a hmasawinna hmuh chu an tum ber a ni, a ti. BJP chuan Development chu an din chhan leh an awm chhan a ni a, chuvangin Mizoram mipui te, thalaite Development an hmuh theih nan BJP ah an thawkho thei a ni a ti.

<><><>

DM&R

Disaster Management and Rehabilitation Minister Prof Lalnilawma chuan Mizoram chhungah furpui chhunga chhiatna tamzaw pumpelh a nih theih nan mi tinten mahni chenna bul theuh tui luankawr enkawl that a pawimawh a ti.

He thu hi Akashvani corr nena an inkawmnaah sawiin Minister chuan Mizoram chu tlang ram ruahtui tamna hmun a nih avangin leimin pawh kum tin a a awm thin a, khuarel chhiatna thleng thin mahsela chhiatna thenkhat chu mihringte fimkhur tawh loh vang a nih thin thu sawiin, mi tinten mahni chenna in bul tui chhe paihna enkawl that bakah leivung paih kawngah pawh fimkhur tak leh uluk zawka chet lak a ngaih thu a sawi.

Minister chuan mahni chenna bulhnai tui luan kawr put ru a awm leh awmlah endik pawh chhungkaw tin leh mimal tinten an mawhphurhna a ni tih hria a, chhiatna pumpelhna atana hma la theuh turin Mizoram mipui zawng zawng a chah tak meuh meuh thu a sawi bawk.

Mizorama district hrang hrang thuneitu ten State Emergency Operation center-a report an thehluk danin, kumin May ni 24 atanga vawiin thleng khan Aizawl district chhungah leimin leh lei tawh hmun 131-ah a awm a, Champhai district chu a tuar nasa ber niin leimin leh lei tawh hmun 269 zetah a awm bawk, Serchhip district chhungah pawh leimin leh lei tawh hi hmun 144-ah a awm a, Lunglei district-ah pawh leimin leh lei tawh hi hmun 82-ah a awm a, heng bakah hian Siaha district-ah 74, Kolasib district-ah 17, Lawngtlai district-ah 13, Mamit district-ah 17, Saitual district-ah 19, Khawzawl district-ah 95 leh Hnahthial district chhungah 29 te a awm bawk a ni.

<><><>

MYC

Mizoram Youth Commission Chairman Pu Malsawmzuala Ralte chuan sorkar tangka kum kalta chhungin MYC hmalakna a Mizo thalai hna hmu zat chu 153 an nih thu a sawi.

Akashvani palai nena an inkawmna-ah MYC Chairman chuan he thu hi sawiin, Hotel management lamah thalai 97 hna an hmuh thu te, MYC Coaching class-a kal thin thalai 33 in sorkar hna an hmuh bakah MYC atanga Spa Therapist training zo thalai 15 te chu Mizoram pawna an tirschhuah thu te a sawi bawk a, Mizoram larsap kalchhuak ta Dr. Hari Babu Kambampati-a hova MYC in hmalakna a neihah Andhra Pradesh-a Special Economic Zone-ah Mizo thalai 8 an tirschhuah thu Pu Malsawmzuala Ralte chuan a sawi bawk.

<><><>

MPCC

Congress Party thupuangtu Dr.Lallianchhunga chuan Mizoram sorkarin Sawhthing a lei khawl hi thar beisei zat atangin zaa 15 vel chauh a ni a, thar chhuah tura beisei zat atangin zaa 84 vel a lei hman lo a ti.

MPCC Spokesperson Dr Lallianchhunga leh a thawhpuiten nimin khan Sairanga sawhthing dah khawmna hmunpui tlawhin, sawhthing an lei khawl sa Mizoram sorkarin a buaipui zui dan a hmunah an en a. Sawhthing lei khawlsa hi a tawih nasa tawh hle a, chung sawhthing tawih te chu hmun engemaw zatah paih khawm a ni a ti a. Ruah surin len bo nual tawh mahse, sawhthing tawih an paihna sulhnu erawh hmuh theih a la ni a. Road Map awm miah lo va sawhthing hi buaipui a ni tih a lang a ti bawk.

Sawhthing dah khawl te hi a hmuna, state pawn mi ten Kg 1 ah Rs.3 leh Rs.5 ten an lei a, mutria ten bag 1 ah Rs 10 hlawhin motor ah an dah lut thin tih a sawi a ni.

Dr Lallianchhunga chuan ZPM sorkar thil kalpui dan fuh lo avangin sawhthing chingtute’n Kg 1 Rs.50 aia sangin sawhthing an hralh theih loh phah a. Sawhthing lei danah ZPM sorkar hian sawhthing chingtute beisei a pha lo nasa hle a ti a, ZPM sorkar chuan Hmunphiah r chhuah beisei zat atangin a zatve aia tam an lei loa; Aieng pheih chu thar chhuah beisei zat atangin lei an nei manglo niin a sawi bawk.

Congress Party thupuangtu ZPM Minister te chu mawhphurhna la ngam lovah puhin, midang puh thiam tak, Chemtatrawta Sorkar dintute an ni a, hetiang sorkar hi tunhmain Mizoramin a la hrawn ngai lo a ni, a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

PM MODI

Prime Minister Narendra Modia chuan vawiin khan Maldives a thleng a. Airport ah Maldives President Dr.Mohamed Muizzu hoin Pu Modi hi ropui taka lo hmuah a ni. Vawiin chawhnu vek khan Maldives President Dr.Mohamed Muizzu nen an inkawm nghal a ni. Hruaitu pahnihte hian India-Maldives thawhdunna hrang hrang an sawidun a. Heng bakah hian thawhdunna tur inremna thuthlung an ziah beisei a ni a. India puihnaa damdawiin leh hmasawmna project an siamte Prime Minister Modia hian a hawng dawn bawk a ni.

<><><>

VICE PRESIDENT ELECTION

Election Commission of India chuan Union Law and Justice Ministry nena inrawnin Vice President thar thlan turah Rajya Sabha Secretary General chu Returning Officer atan a ruat. Commssion chuan Rajya Sabha Secretariat Joint secretary leh Director te chu Assistant Returning Officer atan a ruat bawk a. ni.

<><><>

THAILAND-CAMBODIA

Thailand leh Cambodia ramri buaina thleng mek avanga sipaite inkahnaah Thai mi 14 an thi tawh a, mi 46 in hlaim an tuar. Nilaini khan lei hnuaia bomb kam landmine a puah avangin Thai sipai panga in hlaim an tuar a. Hei hian ram pahnih inkar boruak ti sosangin anmahni ram ve ve sawrkar palaite thawn haw nghal an ni a. Ram pahnihten indawrna mumal an nei thei rih lo a ni. He thil thleng avang hian Thailand-a Indian

Embassy chuan hriattirna tichhuakin Thailand India mi khualzin cham mek te fimkhur turin a chah a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 123-na tur a ni ang. He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>